

清代史料筆記叢刊



郎潛紀聞初筆二筆三筆

下

清代史料筆記叢刊

郎潛紀聞初筆二筆三筆下

〔清〕陳康祺著
晉石點校

中華書局

郎潛紀聞二筆

羽替監開一筆

郎潛紀聞二筆序

陳君鈞堂，以名進士爲郎官，閉門不狎時流，箸書逾百卷。已而改知縣來蘇，首梓《郎潛紀聞》十四卷，於中外政治，當代典章，人事奇怪，條摭而件摭焉，蓋史部載紀類也。今年又梓《燕下鄉陞錄》十六卷。燕下鄉者，遼地名，君京邸近之，故名書。讀之，猶初志也。余喟然曰：此漆園所稱宋人者與有不龜手之藥而泝澌紈，則何邪？今之學者，操不律效程朱語錄，空言滿紙，頃刻尺許厚，獵盛名，攀高位，或妄希兩廡豚，豈不甚便。然而問九經七緯，百家諸子，瞠目不能對一語，亦嘗惡乎否也！夫程朱大賢人也，人卽至不肖，有不趣嚮者誰與。然而效程朱者，果程朱矣乎？夫天下不皆大賢，毋寧多讀書，多識故事，猶勝於絢虛美、紬實用者也。然而人多舍此而就彼，將毋畫仙鬼易、畫人物難乎。余辱與士大夫遊，竊疑博通者之少，卽有矣，輒姍笑叢焉。傳曰：越人美羸蚌而簡太牢，鄙夫樂咋喙而怪韶濩，然邪非邪？夫君書不必賢於人人，然而指稱礪，徵引富，如泰山之雲，潼瀚蔚蒼，日出而巳也。如鬱人貢百草之華，十葉爲貫，百二十貫爲築，鬻之焦中而芬芳條達也。視枵腹而操不律，奚止鈞銖之差耳哉？夫陞之爲言，細碎也，箸書如君，而奚細碎之有邪？夫君多讀書，多識故事而以箸書，而曾不獲獵盛名、攀高位，而又何說邪？光緒七年歲在辛巳冬十一月，歸安楊峴譔。

郎潛紀聞二筆卷一

1 本朝肇基王業

我朝以明神宗四十四年丙辰，太祖皇帝始俯順諸貝勒大臣恭上尊號，建元天命。太宗嗣位，建元天聰。天聰九年，以收服察哈爾全部，獲歷代傳國玉璽。明年四月，始建國號曰大清，改元崇德。國人初尊太祖爲聰睿貝勒，至天命九年，恭上尊號曰覆育列國英明皇帝。太宗崇德元年，羣臣恭上尊號曰寬溫仁聖皇帝。昔成周幽岐剋業，太王、王季，猶待追崇，不若聖朝天造經綸，戡亂攻昧，當洪基俶建之初，已赫然有撫中國、子萬民氣象也。

2 太宗伐明

天聰三年，太宗以明國屢背盟誓，親統大兵征之。入洪山口，克遵化城，遂由薊州進規燕京，駐營城北土城關之東，復移駐南海子，距關廂僅二里。諸貝勒請攻城，太宗諭曰：「朕仰承天眷，攻城必克，所慮者儻失我一二良將，卽得百城亦不足喜。」遂止弗攻。聖人智勇天錫，猶審幾遵養如此，唐之太宗、宋之藝祖，瞠乎後矣。

3 本朝開國方略（九則）

天命十一年，設八旗大臣。天聰二年，定文館職司；五年設六部；六年定城守官三年考察之例；八年定八旗職官名；十年更定內三院。崇德元年，定內院官制，設都察院；二年設八旗議政大臣；三年設理藩院，定部院制；八年設禮部、蒙古理事官。此我朝澄敘官儀之始。

太祖乙卯年定八旗軍制。太宗天聰三年三月，定軍令於外藩；八月，定行軍賞罰例；五年，定出征軍制。崇德八年，定軍律。此我朝整敕戎行之始。

天命五年六月，設納言之木於門外。天聰五年，令貝勒大臣盡言直諫。此我朝下詔求言之始。

天命二年，令詳慎訟獄。天聰九年，禁徇私枉斷。崇德五年肆赦。此我朝明刑弼教之始。太祖乙卯年，令羣臣舉賢才；五年令貝勒大臣子弟就學；三年授舉人、生員官階，優免丁役。此我朝興賢勸學之始。

天聰六年，行新定朝儀。崇德元年，行太廟薦新禮；三年諭禮部申明禁令；八年定內外相見禮。此我朝班朝肅廟之始。

太祖甲寅年，令國人屯田曠土。太宗天聰九年，禁濫役妨農。崇德元年，禁屯積米穀，令及

時耕種；二年令各屯堡及時勸農。此我朝重農貴粟之始。

天聰元年，發帑賑饑；二年，發帑資民嫁娶。崇德二年，諭貸粟資民；六年，以歲歉諭行備荒事例。此我朝孚惠民生之始。

天命八年，勛羣臣勤職；十一年，勛諸貝勒毋習逸樂。崇德二年，諭諸大臣勤修國政；七年，諭諸王貝勒勤修政事。此我朝誠諭臣工之始。

已上九則，均見《開國方略》。我祖宗一隅肇造，業業兢兢，當周縣商胤之始基，已姚典如謨之畢備。攷其時，正明國未造，君闇臣揚，百度寢弛，無復綱紀興亡之故。蓋不待王師入關，真人定鼎，而早可瞭然。後有萬年，殷鑒不遠，聖子聖孫，作求世德。念之哉！戒之哉！

4 何文端進德之勇

何文端公按：《謚法考》無何文端者，雍正初吏「禮」尚何世璉謚端簡。何實出身翰林，而不得文字，故文端誤記與。居京師時，一同年詣之，日晏未起，久之方出。客問曰：「尊夫人亦未起耶？」答曰：「然。」客曰：「日高如此，內外家長皆未起，一家奴僕，其爲奸盜詐僞，何所不至耶？」公瞿然，自此至老不晏起。見桐城張文端《篤素堂集》。讀此，可見何公進德之勇，並可見前輩處朋友間，規過責善，如是其嚴也。

5 鄂文端有古大臣風

西林鄂文端公爾泰總督雲貴時，雲撫江陰楊文定公方獲譴，新巡撫朱綱多方羅織，至欲用刑訊，兵民汹汹，爲文定頌冤，謀羣起擊綱。公好言撫慰之，復厲聲責綱曰：「過湯陰岳忠武廟，見鐵人乎？」獄得解。高宗卽位，首召文定。文定旋奏公處置苗疆非善策，公不以爲忤。文定沒，公經紀其喪，哭之哀。嗚呼！可謂大臣矣。

6 鄂文端力保孫文定

世宗時，合河孫文定公被誣有婪贓，據以入告者，親王也。上詢之鄂文端公，公曰：「孫嘉淦性或偏執，若操守，臣敢以百口保之。」上意解，卽命公弟訊問。事白，抵誣者罪。公弟名爾奇，時與文定同以少司空兼祭酒，亦賢者也。

7 雷翠亭持躬之正

閩中自李文貞、蔡文勤二公重振龜山、考亭之緒，薪盡火傳，理學大暢，繼之者，甯化副憲雷翠亭先生鉉也。先生隨計入都，寓文勤邸，朱高安方居比鄰。文勤語先生曰：「高安素知子，子

可一見。」先生以陸清獻不見魏蔚州爲比，後高安禮先焉，乃往見。又一日，孫文定過文勤，文勤語先生曰：「孫公實爲子來，當一往以答其意。」先生曰：「不敢也，將有保舉，恐近自媒。」文定終薦之，補國子監學正。

8 雷翠亭劾奏余棟奪情

乾隆初元，甯化雷公以庶吉士蒙特召，侍阿哥書房講讀，嚴正恪勤，於中貴不假辭色。嗣丁憂編修余棟，以皇太子薨，入京，被命留侍諸皇子。公奏皇子侍奉之人，必明大義、篤倫理，方於學術、性情有助；余棟父喪未葬，若隱忍行走，則講書至宰我問三年章，何以措口，於天下風化有關，於是編修得終制。按：公之學出自漳浦蔡文勤公，文勤則李文貞嫡傳也。公劾奏奪情，侃侃如此，於安溪一脈，不能不謂之青冰。《鮚埼亭集·楊文定公行述》稱余編修奪情時，文定力言其不可，上收還成命，文定亦安谿高第。

9 顧琮之風節

混同顧公琮，太師文端公名八代孫也。風骨挺勁，在滿洲大臣中，與蝶園徐公並稱，時人爲之語曰：「前徐後顧，剛亦不吐。」世宗初年，設會考府，公爲主事，杖某親王府吏，親王初不悅，而

後奇之。公嘗持議，欲行限田法，以均貧富，與用事大臣動色爭於上前，無所撓挫。有文覺禪師者出都，聲勢烜赫，騎從如雲，道出袁浦，究、豫二州方面大僚率屬郊迎恐後。公方與前總漕魏公廷珍相交替，皆若弗聞也者。公在京師守制時，小車敝帷，人以爲厮養。奉命治漕，治南北河，久享厚祿，老病罷歸，至不能僦一廛以居。壁立千仞，清絕一塵，惟公實允蹈之。

10 羅臺山逃儒入佛

康祺少有知識，瀏覽近今古文家，測其旨趣，頗惜長洲彭紹升二林、瑞金羅有高臺山之學，陽儒陰釋，殊太決其籬樊。稍長，則聞前輩言臺山游奉化雪竇，爲邏者所獲，疑爲盜，賴吾邑邵侍郎洪得脫，吾以爲謝康樂之爲山賊也。頃讀惲子居氏《大雲山房集·臺山外傳》曰：「臺山少好技擊，兼治兵家言，嗣學於贛鄧元昌，修儒者之業，於書無所不窺，精思入微，遂喜佛法。自京師歸，忽登樓縱火自焚，救之得不死。遂狂走入山，服沙門服，不下髮，跌坐，與人言孝弟，而歌泣無時。下揚子，渡錢塘，過甬東，多託迹佛寺中。奉化快手怪其服，合儕輩篡臺山，臺山徒手禦之，不可近。因詣縣，跌坐縣庭，爲禪語。同年生主事邵君洪，時家居，識臺山，乃釋之。遂游普陀，寓西湖，已復走京師，乃歸而卒。」又論曰：「臺山於倫甚修，所以處之甚厚，不得已，乃至於如此，其諸無愧爲聖賢之徒者歟。」按：惲氏此文，似臺山之入墨，亦自有託而逃。譬如病榻呻

吟，聊自緩其痛苦。彼彭二林者，又何所爲而甘棄其飲酒食肉之身，昏昏叫號，靡所脅驅而遽自淪溺耶？噫！

11 本朝沿襲奉聖夫人封號

惲子居《大雲山房雜記》載：康熙十六年七月二十五日，特封世祖章皇帝之乳母樸氏爲奉聖夫人，頂帽服飾，照公夫人例。嗣後多有乳母之封，外廷至不知其姓氏，本朝推恩之厚，家法之肅，具見矣。按：惲氏以封及乳母爲恩厚，不降明旨爲法肅，其言善矣。康熙竊謂本朝定鼎之初，官府典章，多沿明代，以奉聖夫人封天子乳母，恐亦是勝國舊稱。康、雍而後，綱紀聿新，保姆微勞，膺受渥賚，禮亦宜之，奉聖崇封，必已裁革，宜二百餘年罕見紀述也。

12 禮烈親王（二則）

和碩禮烈親王，太祖高皇帝次子也，從征屢建大功，封大貝勒。太祖崩，王首倡議於朝，戴太宗爲主。世祖嗣位，王次子碩託、孫阿達禮，謀立睿親王，王發其謀，兩人皆伏誅。昔泰伯讓國，尚少披荆斬棘之奇勳；周公滅親，究非離裏屬毛之繼體。天祚聖清，篤生懿弼，忠貞神武，翼戴三朝，史冊所書，少雙寡二者也。

天聰五年，大清兵圍大凌河城，生禽明監軍道張春等。春見太宗不跪，太宗引弓怖之。禮烈親王諫曰：「彼不懼死，射之何爲。」乃舍之，春終不失節，以壽終。我文皇帝大度如天，從諫如流，固宜海內英豪，聞風景附，屋彼明社，有如拉朽摧枯也。

13 怡賢親王

和碩怡賢親王，聖祖皇帝第十三子。雍正三年，疏請減東南浮賦，奉旨俞允。其年冬，總理水利營田事，濬畿甸河渠，闢荒地數千里，募民耕種，期年而有收。王屢承詔決大獄，多所寬釋。因奏言：「聽訟之道，求之辭色，以察情僞，設誠以待之，據理以折之，未有不得其實者。若概用刑求，三木之下，何求不得，此冤抑之所以難伸也。」世宗以其言頒示直省，有司刻木勝於堂。四年，御書「忠誠敬直，勤慎廉明」八字以賜。復條析王善行，宣布中外。比薨，詔奉天、直隸、江南、浙江各爲王立祠，爲天潢懿戚振古未有之榮。蓋世宗之於王，恩誼隆稠，不啻布衣昆季，而王之謙畏寅恭，善承眷睞，亦殊足以上契聖心。吁！難已！盛已！按：賢王政迹，畧見前編，頃讀宗室王公傳，尤得其詳，補輯於此。

14 鄭獻親王

和碩鄭獻親王，爲太祖皇帝弟之子。世祖嗣位，與睿親王同輔政，功亦相埒。扈駕入關，封信義輔政叔王。十二年，上疏推述太祖、太宗遺烈，以爲平治天下在信詔令、順人心；前方降詔恤滿洲官兵疾苦，已復令修乾清宮，詔令不信，何以服人。又請設起居注官，垂信萬世。世祖善之。夏，薨於位，遺言勸上以統一四海爲念。上哀慟，詔圖像宮中。

15 鎔化內府金鐘

咸豐三年四月，命大臣監視鎔化內府金鐘，凡黃鐘二、太簇一，皆乾隆五十五年所鑄，鏽鐘也。蓋是時軍饟方亟，庫藏空虛，聖心焦勞甚矣。

16 翁文端兩爲祭酒

翁文端公以大理寺少卿丁艱，服闋還京，補國子監祭酒。祭酒秩從四品，理少秩正四品，例不得補。時宣宗亟欲擢用，故有是命也。於是文端兩爲祭酒，儒者榮之。

17 文淵閣典守官

乾隆閒四庫書成，庋藏文淵閣，始置官典守，雖兼銜貼職，實爲翰詹諸臣清要之任。朱文正

公首直閣事，皇十一子成親王刻石印贈之。嗣阮文達公繼充是選，文正遂以印付之文達。

18 布衣胡文忠之死

安徽布衣胡文忠，當賊破定遠時，家毀於難，鬻其女，隻身赴京師，謂林遠村侍御之望曰：「督師者久無功，又驕縱好聲色。皖名城多陷，苗沛霖跋扈，反形日露，督師者若不知，民無生望。使前督師者終不去皖，何至是。」前督師者，袁甲三也。若有言責，當人告。」侍御唯唯。胡不及待，遂自縊死。死猶懷書責林，語益激，林乃並書疏聞。未幾，督師者以母喪，詔許來京，而復以前督師者往。見許宗衡《玉井山館筆記》。

19 簡儀親王有志聖賢之學（二則）

本朝宗藩懿戚中，學術之正，政治之醇，莫如簡儀親王德沛。王爲太祖皇帝弟濟爾哈齊四世孫，早歲應襲父爵爲鎮國將軍，讓與從子，入西山讀書。世宗以果親王薦，召見，問所欲。曰：「願側身孔廟，分特豚之饗。」世宗大器之，授兵部侍郎。王益折節嚮學，立志希聖，一言一動，必由仁義。乾隆初，嘗以吏部侍郎兼祭酒，每人學，摩挲俎豆，不忍決舍。嘗集太學諸生，講《大學》首章，圓橋門聽者千餘人，靡不悅服。獨助教王之銳以爲未盡，復陳說己意，王欣然下階，三

揖而謝。初甘肅地瘠，歲常歉，有司視爲固然，無報災成例。王始外任，卽撫甘肅，兩月不雨，立馳奏振之。高宗卽位，遷湖廣總督，調閩浙，再調江南，所至黜陟至公，尤重民事。乾隆七年，淮揚大水，王慮漕粟往，民不及炊，乃實麥餅千艘，蔽運河兩岸，饑民噏聲若流，菜色立變，命府縣官放手開倉以振，甯濫毋隘。是役，奏動地丁、關稅、鹽課銀一千萬兩。奏銷時，屬吏皆以爲危。高宗弗問，蓋信之有素矣。

簡儀親王督閩浙時，巡歷諸郡，所至必先謁先師廟，卽升明倫堂講《易》。屬吏列侍於後，諸生環立於前，函丈之間，雍雍肅肅。其駐節杭州時，於敷文書院繪河洛、方圓、義文諸圖，揭於屏間，王手執松枝，佇立指點，講解移晷。纓笏塞巷，巾卷充庭，莫不傾聽忘倦。僉謂天潢節鉞中古今一人。王在閩，有《龍峰書院講學錄》行於世。所著復有《易圖解》、《實踐錄》二書。康祺敬按：本朝滿洲儒臣，理學經濟，代產巨人，尚未有膺孔庭從祀之榮者，如王及文定公徐元夢、文端公倭仁、文忠公文祥，亦無愧兩廡人物，惜無人焉爲之抗章乞請也。康祺以京官謁選時，自意依流平進，烏臺豸斧，尚非妄希國家闕典，如此類者甚多，謬冀有所論列，私居削牘，讓著成編，茲則不宜復出矣。

20 范文肅三大議

巨清開國元輔，在漢臣中必首推范文肅公文程，其遭遇如漢之留侯、明之誠意，而建樹宏遠